

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1047/12  
Sarajevo, 4.9.2012. godine

**Z A P I S N I K**  
**10. VANREDNE SJEDNICE DOMA NARODA PARLAMENTA**  
**FEDERACIJE BiH, održane 4. septembra 2012. godine**

Sjednica je počela u 12.20.

Sjednici je predsjedavao Radoje Vidović, predsjedavajući Doma naroda Parlamenta Federacije BiH.

Predsjedavajući je pozdravio delegate, predstavnike Vlade Federacije, udruženja i akreditiranih medijskih kuća koje prate rad sjednice.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te Dom naroda može raditi i punovažno odlučivati.

Izostanak sa sjednice opravdali su Hanka Vajzović, Slaviša Mihajlović i Esed Radeljaš.

Predsjedavajući je podsjetio delegate da je Vlada Federacije BiH dostavila Prijedlog Izmjena i dopuna Budžeta Federacije BiH za 2012. godinu i Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu sa prijedlogom da se razmatraju po hitnom postupku.

Premijer Federacije BiH Nermin Nikšić predložio je da se u dnevni red sjednice uvrste sljedeće tačke: Prijedlog Zakona o izmjenama i dopunama Zakona o Agenciji za bankarstvo Federacije BiH i Prijedlog Odluke o prihvatanju zaduženja Federacije BiH prema IV stand by aranžmanu sa Međunarodnim monetarnim fondom.

Predsjedavajući Doma naroda pozvao je delegate da se izjasne da li prihvataju da se Prijedlog Izmjena i dopuna Budžeta Federacije BiH za 2012. godinu i Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu razmatraju po hitnom postupku i, na osnovu rezultata glasanja, konstatovao sljedeće:

- Dom naroda Parlamenta Federacije BiH, sa 44 glasa za, uz jedan uzdržani glas i uz jedan glas protiv, prihvatio je da se Prijedlog Izmjena i dopuna Budžeta Federacije BiH za 2012. godinu razmatra po hitnom postupku;
- Dom naroda Parlamenta Federacije BiH, sa 43 glasa za, uz jedan uzdržani glas i uz jedan glas protiv, prihvatio je da se Prijedlog

Zakona o izmjenama i dopunama Zakona o izvršavanju Budžeta Federacije BiH za 2012. godinu razmatra po hitnom postupku.

U raspravi o prijedlogu premijera da se u dnevni red sjednice uvrste tačke - Prijedlog Zakona o izmjenama i dopunama Zakona o Agenciji za bankarstvo Federacije BiH i Prijedlog Odluke o prihvatanju zaduženja Federacije BiH prema IV stand by aranžmanu sa Međunarodnim monetarnim fondom - učestvovala je Elvira Abdić-Jelenović.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 42 glasa za, uz dva uzdržana glasa i uz dva glasa protiv, prihvatio prijedlog premijera Federacije da se u dnevni red sjednice kao 3. i 4. tačka uvrste - Prijedlog Zakona o izmjenama i dopunama Zakona o Agenciji za bankarstvo Federacije BiH i Prijedlog Odluke o prihvatanju zaduženja Federacije BiH prema IV stand by aranžmanu sa Međunarodnim monetarnim fondom - po hitnom postupku.

Predsjedavajući Doma naroda obavijestio je delegate da je Esed Radeljaš podnio inicijativu za održavanje vanredne sjednice na kojoj bi se raspravljalo o suši i požarima u Federaciji BiH te se zatražilo od Vlade Federacije da dostavi informaciju o učinjenom na saniranju posljedica suša i požara, te šta treba učiniti kako bi se u budućnosti bolje odgovorilo na ovakve elementarne nepogode.

Također, predsjedavajući je obavijestio delegate da je Klub delegata bošnjačkog naroda predložio da se ova sjednica odgodi dok se ne razriješi situacija vezana uz rukovodstvo Predstavničkog doma nastala presudom Ustavnog suda Federacije BiH. Predsjedavajući je izjavio da većina članova Kolegija Doma naroda smatra da to nije dovoljno valjan razlog za odgađanje sjednice i da ju je potrebno održati.

Amir Zukić je izjavio da nije on, u ime Kluba delegata bošnjačkog naroda, zatražio odgađanje sjednice zbog situacije u Predstvnničkom domu, već da Ustav Federacije i Poslovnik o radu Doma naroda propisuju da se sjednice Doma naroda, po pravilu, održavaju poslije sjednica Predstavničkog doma, ali je, također, naglasio da će Klub delegata bošnjačkog naroda učestvovati u radu današnje sjednice.

Budući da više nije bilo prijedloga za izmjenu i dopunu dnevnog reda, predsjedavajući ga je dao na glasanje i konstatovao da je Dom naroda Parlamenta Federacije BiH, sa 41 glasom za, uz dva uzdržana glasa i uz dva glasa protiv, usvojio sljedeći:

## **D N E V N I R E D**

1. Prijedlog Izmjena i dopuna Budžeta Federacije BiH za 2012. godinu - hitni postupak,
2. Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu - hitni postupak,
3. Prijedlog Zakona o izmjenama i dopunama Zakona o Agenciji za bankarstvo Federacije BiH - hitni postupak,

4. Prijedlog Odluke o prihvatanju zaduženja Federacije BiH prema IV stand by aranžmanu sa Međunarodnim monetarnim fondom.

**1. Prijedlog Izmjena i dopuna Budžeta Federacije BiH za 2012. godinu**

**2. Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu**

Prijedloge je utvrdila Vlada Federacije i dostavila ih Parlamentu Federacije radi usvajanja.

Prijedloge su razmatrala nadležna radna tijela i dostavila izvještaje.

Kolegij Doma naroda predložio je da se obavi zajednička rasprava o ovim tačkama a izjašnjavanje obavi pojedinačno, što su delegati prihvatili.

Prijedlog Izmjena i dopuna Budžeta Federacije BiH za 2012. godinu i Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu obrazložili su premijer Nermin Nikšić i federalni ministar finansija Ante Krajina.

Salko Selman, predsjednik Odbora za ekonomsku i razvojnu politiku, finansije i budžet Doma naroda, obrazložio je Izvještaj i zaključke koje je Odbor predložio.

Mustafa Kurtović, predsjednik Odbora za poljoprivredu, vodoprivredu i šumarstvo Doma naroda, obrazložio je Izvještaj i zaključke koje je Odbor predložio.

U raspravi su učestvovali: Predrag Kojović, Zoran Jovanović, Ivo Divković, Dževad Rađo, koji je posebno istakao da je potrebno donijeti zaključak kojim bi se obavezala Vlada Federacije i nadležna ministarstva da poboljšaju kontrolu potrošnje javnog novca, uplate i prinudne naplate dugova na osnovu poreza i doprinosa a sve s ciljem povećanja prihoda budžeta, Josip Perić, Senahid Šaković, Aner Žuljević, Ivo Tadić, Mira Ljubijankić, Hajrudin Bećirović i Mladen Lonić.

Na Prijedlog Izmjena i dopuna Budžeta Federacije BiH za 2012. godinu amandmane su podnijeli:

- Administrativna komisija Doma naroda - jedan amandman koji se odnosi na uvećanje ekonomskog koda 613900 i ekonomskog koda 613100 u Glavi 1001;
- Klub delegata hrvatskog naroda u Domu naroda Parlamenta Federacije BiH - jedan Amandman koji se odnosi na Razdjel 16 na promjenu u ekonomskom kodu 614100 - Tekući transferi drugim nivoima vlasti – kantoni - iznos od 12.000.000 KM namijenjen nižim nivoima vlasti da se promijeni tako da se Bosansko podrinjskom kantonu Goražde dodijeli 5.000.000 KM, Posavskom kantonu 5.000.000 KM i Kantonu 10 2.000.000 KM;
- Luka Faletar – jedan amandman koji se odnosi na predviđanje sredstava u iznosu od 200.000 KM Općini Prozor – Rama za završetak izgradnje doma za stara i nemoćna lica u Rami;

- Ivo Tadić – jedan amandman koji se odnosi na predviđanje sredstava u iznosu od 300.000 KM Općini Žepče za projekt izgradnje vodovoda u MZ Lug – Brankovići i Ozmica;
- Tomislav Mandić – dva amandmana koji se odnose na predviđanje sredstava u iznosu od 4.000.000 KM kojim bi se pokrio budžetski deficit Zapadnohercegovačkog kantona i na predviđanje sredstava u iznosu od 1.700.000 KM kojim bi se osigurala sredstva za nastavak izgradnje osnovnih škola u Širokom Brijegu, Posušju i Grudama;
- Mustafa Kurtović i Daliborka Milović - jedan amandman koji se odnosi na Razdjel 16 na promjenu u ekonomskom kodu 614100 - Tekući transferi drugim nivoima vlasti – kantoni - iznos od 12.000.000 KM namijenjen nižim nivoima vlasti da se uveća na 16.000.000 KM i da se Bosanskohercegovačkom kantonu Goražde dodijeli iznos od 7.040.000 KM.

Nakon toga predsjedavajući je zaključio raspravu i pozvao Vladu Federacije BiH da se izjasni o podnesenim amandmanima na Prijedlog Izmjena i dopuna Budžeta Federacije BiH za 2012. godinu.

Potom se delegatima obratio Avdo Muslimović, predsjednik Saveza poljoprivrednih udruženja Federacije BiH, koji je pozvao delegate Doma naroda da ne glasaju za Prijedlog Izmjena i dopuna Budžeta Federacije za 2012. godinu.

Nakon toga je predsjedavajući dao pauzu.

Nakon pauze, predsjedavajući je podsjetio delegate Doma naroda da je do završetka rasprave podneseno sedam amandmana na Prijedlog Izmjena i dopuna Budžeta Federacije za 2012. godinu, te je pozvao predstavnika Vlade Federacije da se izjasni o podnesenim amandmanima.

Federalni ministar finansija Ante Krajina je, u ime Vlade Federacije, izjavio da se ne prihvata nijedan podneseni amandman.

U ime Administrativne komisije Doma naroda Radoje Vidović je izjavio da povlači podneseni amandman, imajući u vidu garancije Vlade Federacije da će biti osigurana finansijska sredstva za funkcioniranje Doma naroda.

Budući da ostali predlagači amandmana nisu odustali od predloženih amandmana predsjedavajući ih je dao na glasanje.

Na osnovu rezultata glasanja, predsjedavajući je konstatovao da je, sa 34 glasa za, uz sedam uzdržanih glasova i uz jedan glas protiv, usvojen amandman Kluba delegata hrvatskog naroda.

Amandman glasi:

U Prijedlogu Izmjena i dopuna Budžeta Federacije BiH za 2012. godinu u razdjelu 16, ekonomski kod "614100 - Tekući transferi drugim nivoima vlasti – KANTONI u iznosu od 12.000.000", mijenja se i glasi:

“614 100 - Tekući transferi drugim nivoima vlasti Bosanskopodrinjski kanton Goražde - 5.000.000,  
 614 100 - Tekući transferi drugim nivoima vlasti Posavski kanton - 5.000.000,  
 614 100 - Tekući transferi drugim nivoima vlasti Kanton 10 - 2.000.000”.

Na osnovu rezultata glasanja, predsjedavajući je konstatovao da nije usvojen amandman Ive Tadića jer je za glasalo 11 delegata, 20 delegata je bilo uzdržano a pet delegata je bilo protiv.

Na osnovu rezultata glasanja, predsjedavajući je konstatovao da nije usvojen amandman Luke Faletara jer je za glasalo 16 delegata, 24 delegata su bila uzdržana a jedan delegat je bilo protiv.

Na osnovu rezultata glasanja, predsjedavajući je konstatovao da nije usvojen amandman Daliborke Milović i Mustafe Kurtovića jer je za glasalo 14 delegata, 25 delegata je bilo uzdržano a četiri delegata su bila protiv.

Nakon toga se glasalo o dva amandmana koje je podnio Tomislav Mandić.

Na osnovu rezultata glasanja, predsjedavajući je konstatovao da nije usvojen amandman I. Tomislava Mandića jer je za glasalo 13 delegata, 26 delegata je bilo uzdržano a četiri delegata su bila protiv.

Na osnovu rezultata glasanja, predsjedavajući je konstatovao da nije usvojen amandman II. Tomislava Mandića jer je za glasalo 13 delegata, 21 delegat je bio uzdržan a pet delegata je bilo protiv.

Nakon toga predsjedavajući je dao na glasanje Prijedlog Izmjena i dopuna Budžeta Federacije za 2012. godinu i konstatovao da je Dom naroda, sa 37 glasova za, uz četiri uzdržana glasa i uz četiri glasa protiv, usvojio Prijedlog Izmjena i dopuna Budžeta Federacije za 2012. godinu.

Karolina Pavlović je izrazila sumnju u tačnost rezultata glasanja te je zatražila da se delegati Doma naroda poimenično izjasne o Prijedlogu Izmjena i dopuna Budžeta Federacije BiH za 2012. godinu.

Poimenično prozivanje delegata obavio je Izmir Hadžićević, sekretar Doma naroda.

Na osnovu rezultata poimeničnog glasanja, predsjedavajući je konstatovao da je Dom naroda, sa 40 glasova za, uz pet glasova protiv i uz dva uzdržana glasa, usvojio Prijedlog Izmjena i dopuna Budžeta Federacije BiH za 2012. godinu.

Sa 38 glasova za i uz jedan uzdržani glas, Dom naroda usvojio je sljedeći:

## **ZAKLJUČAK**

1. Zadužuje se Vlada Federacije BiH da sa nadležnim ministarstvima sačini plan i razmotri mjere za saniranje šteta nastalih usljed posljedica poplava, dugotrajnih suša i požara.
2. Zadužuju se Vlada Federacije BiH i nadležna ministarstva da povećaju kontrolu potrošnje javnog novca, naplate poreza i doprinosa s ciljem povećanja prihoda budžeta.

3. Zadužuje se Vlada Federacije BiH da dio prihoda od GSM licence usmjeri za izgradnju i sanaciju magistralnih i regionalnih cesta.
4. Zadužuje se Federalno ministarstvo poljoprivrede, vodoprivrede i šumarstva da hitno pristupi usklađivanju programa utroška sredstava sa izmjenama i dopunama Budžeta Federacije BiH za 2012. godinu i odmah izvrši isplatu poticaja za animalnu i biljnu proizvodnju za prvih osam mjeseci 2012. godine.
5. Zadužuje se Vlada Federacije BiH da amandmane na Prijedlog Izmjena i dopuna Budžeta Federacije BiH za 2012. koji nisu usvojeni ponovo razmotri i u skladu sa mogućnostima planira sredstva za njihovu realizaciju u budžetu za 2013. godinu.
6. Dom naroda Parlamenta Federacije BiH stavlja van snage Zaključak donesen na 6. vanrednoj sjednici Doma naroda od 11.1.2012. godine kojim je obavezao Vladu Federacije BiH da najmanje 10% sredstava predviđenih poticaja za poljoprivredu u 2012. godini usmjeri za održivi povratak u Republiku Srpsku.

## **2. Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 38 glasova za i uz jedan uzdržani glas, usvojio Prijedlog Zakona o izmjenama i dopunama Zakona o izvršavanju Budžeta Federacije BiH za 2012. godinu.

## **3. Prijedlog Zakona o izmjenama i dopunama Zakona o Agenciji za bankarstvo Federacije BiH**

Prijedlog Zakona utvrdila je Vlada Federacije.

Prijedlog Zakona obrazložio je Ante Krajina, federalni ministar finansija.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 34 glasa za, uz četiri uzdržana glasa i uz dva glasa protiv, usvojio Prijedlog Zakona o izmjenama i dopunama Zakona o Agenciji za bankarstvo Federacije BiH.

## **4. Prijedlog Odluke o prihvatanju zaduženja Federacije BiH prema IV stand by aranžmanu sa Međunarodnim monetarnim fondom**

Prijedlog Odluke utvrdila je Vlada Federacije.

Prijedlog Odluke obrazložio je Ante Krajina, federalni ministar finansija.

U raspravi je učestvovala Elvira Abdić-Jelenović.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 34 glasa za, uz dva uzdržana glasa i uz tri glasa protiv, donio Odluku o prihvatanju zaduženja Federacije BiH prema IV stand by aranžmanu sa Međunarodnim monetarnim fondom.

Sjednica je završena u 16:37.

\* \* \*

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Radoje Vidović